

Mirjia Sul

Sorloxmexr zzirmar si ho a, Yirsaexllixl goxrjia ddei mel goxrjia nrmel bbe mal a. Baexrfa piar a gga zoxlyoxl zzir zzi ddei mel Sarmarlixlyal zzi ddei nga a. Naxrfa piar a gga zoxlyoxl zzir zzi ddei nael Yiluxlsaler zzi ddei nga a.

Mirjia sul eil ber mel Yihexrhuaxr Mirjia leil sser dae a vaexr a. Mirjia mel naxrfa piar a gga ddei xiezi a. Yar xiezi yarjiar mel leil, nr seir bei su vaervaerpor mel leil, halae casolssor mel leil gguxci su cabessor mel leil bota. Ca eilmel mel dexryixl Arbosobo Moxrxi dax bbeixharzaxr dae mel dax bei nr mae. Mirjia mel Yoxrdaxl su ca mel leil naxrfa piar a gga goxrjia ddei arddolcar a goxrsol-goxrnaxr pex dae var bbeix gger. Xiezi Amoxrsi baexrfa piar a gga goxrjia gga ca mel leil arddolcar a goxrsol-goxrnaxr pex dae var bbeix gger zaxr dae ddei dax lesel. Mirjia Yirsaexllixl su ca mel leil Arbosobo arddolcar a yar dax bei nr mae Yirsaexllixl su ca mel leil faxr nia bbeixarnar, nael yar halae yaa leil zoxlnixr var saexl lol. Yoxl yar yaa leil guaxr a toltor a nga lol var, halae Daxlweixl ddei cuxr gga zzirmar ar ddei ddux lei lol a, Yirsaexllixl goxrjia ddei leil guaxr a arddolcar ci a lei toltor a nga lol var saexl lol.

1 ¹ Yuetar, Yalhasi nei Xisijia yaa Yoxrdaxl goxrjia ddei zzirmar bei dae halleix,^a Yihexrhuaxr Moxrlixlsa su ca Mirjia leil meixcir mia lol a, yar leil Sarmarlixlyal zzi nei Yiluxlsaler zzi arsae lerler nga var ddar mel bbeix gger.

Sarmarlixlyal Zzi Ddei Leil Bei Xiaxr Gger Nia

² Mirjia bbeix:

“circuxr-hanga ca mel, nia noni dae nia!

^a1:1 Yuetar, Yalhasi nei Xixijia yaa Yoxrdaxl goxrjia ddei zzirmar bei dae halleix, Zzirmar eilmel Yisu leil nr xiu seir xilmeir leil (Yisu Xilmeir YX) 740 - 687 eil ngorcei so koxl gga naxrfa piar a gga ddei goxrjia ddei leil guaxr. Yaa cir ddei guaxr teil a cir ddei guaxr.

Middurbbor nei middurbbor hazza lei noni dae nia!
Seirpor Yihexrhuaxr mel nia nr hoxr mel bbeix nia.

Seirpor yar ddei seirceix-seirmaer xi gga nia leil bota nia.

³ I ddo a! Yihexrhuaxr yar hher ggie ddux lei a.

Yar zeil lei a, middurbbor darmumu ggie ssi.

⁴ Worga mel yar woxrke mier a, laxrzuxr mel adoxl gga zzi sael a nga.

Lagaex mel zex bbeixr nia, ajjix dazixlbe leil pe zeil sael a nga.

⁵ Eimel maelmaerjjia lei Yargel Arbosobo leil dir zuixl bei a zzi a;
Yirsaexllixl hhexr zuixl bei a zzi a.^b

Yargel arddolmaex gga Arbosobo leil dir a neil?

Nrnga Sarmarlixlyal zzi ddei gga a zzarmar?

Yoxrdaxl mermi darmumu ggie neirziggie ddei arddolmaex gga zza dae neil?

Nrnga Yiluxlsaler zzi ddei gga a zzarmar?"

⁶ Yel Yihexrhuaxr bbeix:

"Ngo Sarmarlixlyal zzi ddei leil mipaerbbae gga ddei legelbbe cili loxr lol a, puxrto dae ggie bei nia.

Zzi gga legelbbe mel, lagiex gga dox zeil gger a, sixrjiuxr xiex dae ddei ddux lei lol nia.

⁷ Yar ddei kiexl teixl lei bbex maelmaerjjia leil deil me gger nia; yar ggecir vur lel a li wo worper maelmaerjjia adoxl sser a, cu pixl gger nia;

yar ddei bbex maelmaerjjia leil ngo bei xiexr jjia gger nia.

Yar ggecir vurllesu ssormaer mel dax vei si lei worper mel, ggecir vurllesu ssormaer ddei worper loxr xixl lalnga,"

eine bbeix a.

⁸ Mirjia bbeix:

"Eine nga a, ngo bbialil-bbialor aenge lal nga a;

^b1:5 "Yargel Arbosobo leil dir" ddei yiksi mel dder Yargel giedae ca mel Arbosobo leil dir. Yargel giedae ca mel hherdder Yirsaexllixl hhexr nga a.

ciddur-leixrte gorni-gorlael ssi lal nga a;
 yoxl anol yir sael a, cix a me lal nga a;
 ngax vaervaer ddei sael a, cix a ae lal nga a.

⁹ Yar leil bei no dae ddei i kor gger nr cexr;

Yar goxrsol-goxrnaxr dae eil ddei Yoxrdaxl goxrjia lei ssi ci a;^c
 Yiluxlsaler ngo ddei cassor-worssor mel ddei zzi gielmi alddur
 dax zzezze lei ssi ci a.

Yoxrdaxl Su Leil Faxr Nia

¹⁰ Yoxrdaxl su ca mel, nia Jiatexl zzi gga eilmel biar nr ddo;
 cirleixr lei nge nr ddo;^d

Boxryalfuxrla^e su ca mel nilme mel gga guir ji dae nia.^f

¹¹ Safei^g su ca mel, nia leil mel,

gorni-gorlael seixldadamo ggaxr teil gger lei nia.

Sarnaxr^h su ca mel ddux lei nr bel;

Boxryirxueⁱ su ca mel aenge a,

nia yaa dax pahher ggje nr zza.

¹² Marlxl^j su ca mel zzerzzelzzer zoxrzixr a seirseir li wo loxia.

Nael goxrsol-goxrnaxr mel Yihexrhuaxr dax halmaex zeil lei a,
 Yiluxlsaler zzi gielmi alddur dax jiujiu ssi ci a.

^c1:9 Boxryalfuxrla zzi ddei leil cuxrteixl a, jiasibbor biar dae zzi maelmaerjia lei Yoxrdaxl goxrjia ddei zzi a. Zzi eilmel gga ddei ca mel lei goxr sol a.

^d1:10 nia Jiatexl zzi gga eilmel biar nr ddo; cirleixr lei nge nr ddo; Ca cirmelmel zzirdae a ddar eil qir ddei yils mel dder “nia Jiatexl zzi gga eilmel biar nia; nge nia.”

^e1:10 Boxryalfuxrla Boxryalfuxrla ddei yils mel dder “xi ddei nilhar”.

^f1:10 Yoxrdaxl su ca mel goxrsol-goxrnaxr pex dae car bbeixsael huixrsoxr car, nilme mel gga guir ji dae.

^g1:11 Safei Safei ddei yils mel dder “zaelzae”.

^h1:11 Sarnaxr Sarnaxr ddei yils mel dder “ddux su”.

ⁱ1:11 Boxryirxue Boxryirxue ddei yils mel dder “naelnaer xi giex”.

^j1:12 Marlxl Marlxl ddei yils mel dder “kar”.

¹³ Lajixr su ca mel, nia zaxlddaexrddu marcae mel mur leil toxl gex nia.

Yirsaexllixl su ca mel Arbosobo leil dir zuixl mel,
 nia dax halmaex hoba i teixl lei ddo,
 yel Xi'a ddei Ssormaer^k ddei zuixl ddei,
 nia dax bei zza si lei arddeir a.

¹⁴ Eine nga a Moxrlixlsexljiatexl^l su ca mel ssi du a,
 nia Lajixr su ca mel yaa leil zzaegu ho nia.

Yalgexrxixi^m su ca mel,
 Yirsaexllixl goxrjia ddei zzirmar mel leil fur nia.

¹⁵ Marlixlsaⁿ su ca mel,
 ngo nia leil ddaexr leixl gger su ca ddei leil nia dax eilmaex lei lol nia.

Yirsaexllixl su vaervaerpor ddei,
 Yalduxllaxr doxzi gga pahher lei nia.

¹⁶ Yoxrdaxl su ca mel, nia, nia ggese dae ssormine mel leil weix a,
 nia ddei olce mel cox pixl a, ollertaexl loxr lol nia.^o

Yaa leil mel ssu si a, nia dax bbe kae gger a,
 yel nia ollertaexl zzemar mel sael a nga nia.

Ca Leil Gguxci Su Yoxrdaxl Su Ca Mel Ddei Miexr

2 ¹ Mirjia yoxl bbeix:
 “Yixrgguci leil hher dae a, gexrddoddomo bei niazzir,
 halae nr seir bei niazzir su ca mel zoxr a!

Yaa ddei leixrhher gga bbesur zza a,
 merteir a qie, yaa nr seir hal mel bei.

² Yaa mi mel leil tuxr a dder su si;

^k1:13 Xi'a ddei Ssormaer Xi'a mel dder Yiluxlsaler. Xi'a ddei Ssormaer mel dder Yiluxlsaler ddei cassor-worssor.

^l1:14 Moxrlixlsexljiatexl Moxrlixlsexljiatexl mel dder Mirjia ddei mermi. Yilsi mel dder lilyixrqixr.

^m1:14 Yalgexrxixi Yalgexrxixi ddei yilsi mel dder “ca fur”.

ⁿ1:15 Marlixlsa Marlixlsa ddei yilsi mel dder “li wo su” bbeixsael “deil leixl su”.

^o1:16 Yoxrtaexl su capor mel cix a olce mel cox pixl a ollertaexl loxr lol.

xi mel leil li niazzir a dder li si.
 Yaa ca leil nei yar ddei ca hhexr leil gguxci;
 yar ddei leixrmeir mel ka si.”^P

³ Yel Yihexrhuaxr bbeix:

“I ddo a!

Ngo goxrsol-goxrnaxr mel ca eilmel leil ddeix lol nia xiar har
 zaxr ho a.

Nia leihher ddei zuxl gex du lei a, pahher nr cexr.

Halcar mel goxrsol-goxrnaxr car nga a;

yel nia zeixleixr colcolmo ssi dae nr cexr a.

⁴ Hal cir ni ci a, nia leil vuxryixr su ca mel nia leil bbeix no var;
 yaa dexryixl doxdox si bbeix:

‘Ngua leil bei leixl jjia gger ho a naer.

Yihexrhuaxr ngua li wo mibbe mel si leil gger a naer.

Yar arsae ngua ddei mi mel ngua dax eilmaex vei si a,
 yar dax nr mae su ca mel leil gger cexr bbeixleir?’

⁵ Yel ngo ddei cassor-worssor mel mi mel se xixl car,
 nia arseir lei li wo nr ddo.

⁶ Yaa bbeix:

‘Nia arsae lerler nga var daexr nr ddo!

Ca mel eilmel leil daexr nr ddo!

Seixldaddo mel arsae ngua leil ddeix var bbeixleir?

⁷ Holbbaexl Yihexrhuaxr ssertexr nr zza a ngo?

Eilmel mel yar bei a ngo?’

Yargel hhexr arsae eine bbeix cexr bbeixleir?

^P2:2 yar ddei leixrmeir mel ka si Moxrxi ddei Lixlfaxr dax zoxl dae a, yar ddei leixrmeir mel dder yar ddei mi mel nga a. Mi eilmel mel cirhhexr-hanga lei armael ddei porpor mel yaa leil gger arddeir a. Arbosobo Yoxrdaxl su ca mel leil zzicarzzi ddei mi mel nr su lol, nr vae lol. Cu'aezixrjil Sul 20:15,17 nei Semixljil Sul 5:19, 21 leil biar dae.

Yihexrhuaxr yoxl bbeix: Ngo ddei ddar mel,
 holbbaexl jjiimo ssi hoxr su ca mel dax seirggiebbær nr zza a
 ngo?

⁸ Nael eilleix ngo ddei cassor-worssor mel,
 ngo leil vuxryixr su ca mel sael a, ha du lei a, ngo leil dir lei!
 Nia zaxlddaexr ggie zzasoso a jjixr lei su ca mel ddei teixlsibbor
 pia xiux su si.

⁹ Nia ngo ddei cassor-worssor mel gga ssormaer mel leil
 yaa nolnger dae ake mel gga ggaxr teixl gger.
 Halae cirse-cirsil lei ngo yaa ddei ssormine mel leil
 seirseir meixl gger dae mel su si.

¹⁰ Nia zuixl bei a, nia mermi ddei sei-nr-beix a,
 nia mermi ddei bei xiaxr gger nia,
 daxlgaxl-daxllixl bei xiaxr gger nia.

Yoxrdaxl mermi nia wornol ggie nr nga,
 yel nia ha du lei a, ssi nia!

¹¹ Ca fur su xiu ddei ca dax hher ji dae a, yar nia dax ddar jiar te
 a bbeix:
 ‘Ngo nia dax, nia puxрто zziбbær nei pixrjiul mel
 dda lei dda jjia nr ddo zza var bbeix har zaxr arddeirnga a,’
 eine bbeix su ca hal ddei dder nia nolnger dae xiezi ddei loxr
 nia.”

Yihexrhuaxr Yar Ddei Cassor-worssor Mel Leil Jiuxl Nia

¹² “Yargel hhexr, ngo arsaеbeilei nia maelmaerjjia leil cirgo a
 hher pex du lei lol nia;
 arsaеbeilei Yirsaexllixl su zza dae seir ca mel leil cirgo a hher
 pex dae lol nia,
 ya bbe gga ya mel sael a nga;
 yoxl silbbarbbae leil hher dae ya cir sael a nga.

Yaa miur a, bbixbbix-bbaxbbax me nia.”

¹³ Jjiimo hier su ddei yaa xilmeir leil ddeix;
 yaa gielmi alddur gga herhelher co gel a ddux.
 Yaa ddei zzirmar Yihexrhuaxr yaa xilmeirbbaer ssi dae a,

yaa leil hier dae.”

Mirjia Mel Vaervaerpor Nei Xiezi Mel Leil Larhorhormo Bota

3¹ Mirjia bbeix:
 “Yargel ddei vaervaerpor, Yirsaexllixl hhexr ddei vaervaerpor,
 nia noni dae nia!

Holbbaexl nia bbaehhexhhex mel leil saexl nr ssa a ngo?

²⁻³ Nia mel seirseir mel leil vuxryixr, nr seir mel leil lizoxr.

Nia zzeir seixl su ca mel sael a

ngo ddei cassor-worssor mel ddei zzi mel paex,

yaa ddei hherggar mel leil hor laer,

yaa ddei hherggar mel deil te gger,

yaa leil cirpir-cirpir ddaex mal gger a,

zzirggg gga hor mel sael a nga,

allur gga hor mel sael a nga.

Nia yirvu-nilhax mel sael a

ngo ddei cassor-worssor mel ddei ggecir mel leil zzi paex,

yaa ddei hor mel zzor.

⁴ Arddolcar a nia ae dae a Yihexrhuaxr leil qiuxr nia,

nael yar zzael nia leil ddar-nr-koxl.

Nia mel yarzi gexrddo bei a,

yel halcar, Yihexrhuaxr nia leil i lei nr i.”

⁵ Yel Yihexrhuaxr bbeix:

“Xiezi yarjiar mel leil bbeix ci a mel,

yaa ngo ddei cassor-worssor mel leil jjiumo ssi cox lol.

Yaa ddei ser mel ggor ddu zza seir car, yaa dder ‘zzaso’ eine ae.

Ha yaa leil zzorddu nr gger su ca mel dax, yaa dder yaa dax
 zaxlddaexr.

⁶ Eine nga a, eilmerxixl ddei nia leil jiul gex dae a, nia zeixleixr
 meixcir mia nr xie;

neixmarmar ddei nia dax lei ci a, nia zeixleixr arddolcar a

arsae nga var suax teixl lei nr xie.

Merni taex nia dax lal zeil nia;

eilnirrgu ddei nia ggaxrne neixmarmar loxr nia.

⁷ Ngo xiezi yarjia leil ddar-nr-koxl a,
 yel meixcir mia su mel yixrsixr nr zza nia.
 Azo lerler suax su mel, qiaxrmeix zzi nr zza nia.
 Yaa maelmaerjia meir ddei leil bbe gex dae nia,”

eine bbeix a.

⁸ Nael ngo leil bbeix ci a mel,
 Yihexrhuaxr ddei Xiu ddei, halae bbaehhexhhex mel,
 wor mel nei bbesur mel ngo dax bbilbbi hher ji dae a,
 ngo Yargel dax yar Arbosobo leil dir dae mel bbeix teixl lei
 cexr,
 Yirsaexllixl dax yar ddei zuixl mel bbeix teixl lei cexr.

⁹ Yargel hhexr ddei vaervaerpor, Yirsaexllixl hhexr ddei
 vaervaerpor,
 ngo ddei ddar noni nia!

Nia mel bbaehhexhhex mel leil vuxryixr,
 hoxr mel leil cox bbeix mal gger.

¹⁰ Nia ca mel ddei sirnilni mel sser a Xi'a zzi ddei zi,
 nrbbba-nrbbba ser a, Yiluxlsaler zzi ddei zi.

¹¹ Vaervaerpor mel, si yar leil ho dae mel leil weix a, ca leil ser.
 Arbosobo leil zi su mel, worper leil weixr a, lixfaxr mul gger.
 Xiezi mel, piu mel leil weix a, azo lerler suax.

Yaa zzael, Yihexrhuaxr leil koxl a bbeix:

“Nr nga Yihexrhuaxr doxl niul dax hher dax dae zzarmar?
 Goxrsol-goxrnaxr mel arsaebeilei niul leil ddeix nr var,” eine
 bbeix.

¹² Nia mel eine bei a,
 yel Xi'a zzi⁹ ddei leil mi mel sael a mor pox du lei nia;
 Yiluxlsaler zzi ddei caexr zeigger a, legelbbe cili loxr nia;

⁹3:12 Xi'a zzi Xi'a zi meldder Yiluxlsaler zzi nga a. Arbosobo ddei xi zi ggie worga ga lei Yiluxlsaler zzi gga a.

Arbosobo ddei xi zi ggie worga ga darmumu ggie sixzzei cili loxr nia.

Yihexrhuaxr Zzirmar Bei A Mer Woxrke Zaxl-nr-ddaexr

4¹ Mirjia yoxl bbeix: “Nixixl maelele gga,
Yihexrhuaxr ddei xi zzir zi deix dae worga ga,
zoxlyoxl zzir worga ga loxr nia,
worga maelmaerjia leil middux leixl nia.
Middurbbor circuxr-hanga ddei ca mel yilzi a worga eil ga dax
ssi nia.

² Mer woxrke cirgoxr-hanga ca mel lei ssi nia.”

Yaa bbeix:

‘Lei, niul Yihexrhuaxr ddei worga ga leil ddeix a,
Yargel ddei Arbosobo hher ggie xi gga ssi a yo.
Halmaex gga yar niul leil yar ddei ddar mel mul gger a mel,
niul yar ddei jjiumo zex leil ssi nia,’ eine bbeix a.

“Lixlfxr mel Xi'a zzi gga ddux lei nia;

Yihexrhuaxr ddei ddar mel, Yiluxlsaler zzi gga ddux lei nia,

³ Yar hormo cuxr gga ser nia,

vimirmir ggie goxrjia sexrsexr mel leil hoxrhoxr-nrhoxr dixl
gger nia.

Yel yaa altor mel lorqir ddaexr mal nia,

zzi deil a sserddu teixvilvil mel, meixlkor ddaexr mal nia.

Goxrjia mel altor vei dae a zzicarzzi leil nr ddaexr;

yaa lei zeixleixr zaxl ddaexr zza nr ssa a.

⁴ Ca cirddei-hanga lei armael ddei puxrto zzei woxrke cux dae
nia,

armael ddei vuxrhuagol zzei woxrke cux dae nia,
zux lei su ca nr zza.

Eimel mel Merlabbor Meixr Mel Ddei Seirpor Yihexrhuaxr ddei
meir gga bbeix teixl lei a.

⁵ Circuxr-hanga

yaa armael zi dae mel dax mae dae bbeixarnar;

nael ngua zzael, arddolcar ci a lei

ngua ddei Arbosobo Yihexrhuaxr dax mae dae.”

Yirsaexllixl Su Ca Mel Armael Ddei Goxrjia Gga Jjixr Ci Nia

⁶ Yihexrhuaxr bbeix:

“Hal cir ni ci a,

ngo cidael dae mel leil hher pex du lei lol nia,
ggaxr teixl gger mel leil hier pex xixl lei nia,
ngo faxr dae mel leil lei ae pex du lei nia.

⁷ Ngo cidael dae mel leil zza dae seir ca mel loxr lol nia,
ggaxr teixl gger ca mel leil sexrsexrmo ar goxr loxr lol nia.
ngo^s Xi'a worga leil zzirmar bei a yaa leil guaxr nia,
hal cir ni cirdae a eilni arggeni zzezze ci.

⁸ Xi'a ddei Ssormaer hherdder Yiluxlsaler ddei Ssormaer,
ni mel ngo ddei cassor-worssor leil guaxr ggie darmumu ddei
nga a.

Ni goxrjia leil guaxr quexrlixl zza xixl nia,
zzirmar bei xixl nia.”

eine bbeix a.

⁹ “Eilcar, ni arsaenga a bbialil-bbialor aenge leir?
Holbbaexl nia dax zzirmar nr zza a ngo?

Bbeixsael ni dax cirza-hanga zzibbe su ddei si a,
no ddei ni leil zilzir zox gex dae a, anix xiu su ssormaer mel
sael a nga a leir?

¹⁰ Xi'a ddei Ssormaer,
eilcar ni zzi gga ddux lei nia, mipaerbbae gga hher dae nia,
yel ni anix xiu su ssormaer mel sael a meixbbix lei no teixl lei
nia.

Ni lei Babirluixr zzi gga ssi nia.

Nael halmaex gga ni leil jiuxl wo ddo.

Halmaex gga Yihexrhuaxr ni leil, ni leil dir su ca mel leixrga gga
vae xixl lei nia.

^s4:7 ngo Xiboxrlaexr ddar mel “Yihexrhuaxr” eine bbeix.

¹¹ Eilcar goxrjia cirke a hher pex du lei a, ni leil dir lei a bbeix:
 ‘Xi'a leil bei naex gger lol nia,
 niul meixddur zze yar leil igax nia^t,’ eine bbeix.

¹² Nael yaa zzael Yihexrhuaxr xiar dae mel leil nr saexl.
 Yaa lei yar bei niazzir dae mel leil nr saexl.

Yar yaa leil hher pex du lei lol a,
 loxlmoxr cirkuir-cirkuir mel ggieddei gga vei pex gger mel sael
 a nga.”^u

¹³ Yihexrhuaxr bbeix:

“Xi'a ddei Ssormaer,
 ha du la a, loxlmoxr ddaexr ddo a!
 Ngo ni ddei cuxgexdaex baex leil he loxr lol nia;
 ni ddei bbexr taex leil zzir loxr lol nia,”

eine bbeix a.

Ni hormo cuxr leil deil me gger nia,
 yaa ddei zzaegu perniarniar mel Yihexrhuaxr leil gger nia,
 yaa ddei zzaegu naxrcixlcixl mel mer woxrke ddei Seirpor leil
 gger nia.

5 ¹ Yiluxlsaler zzi gga ddei cassor-worssor,
 niul leil dir su ca mel niul leil weixr gex du lei a,
 yaa zzargger sser a, Yirsaexllixl su ca ser su ddei qiaxrmeix ddei
 leil deil nia;
 yel eilcar nia meixr mel leil hher pex du lei lol nia!

Mirsaexlyal Leil Boxrlxlhexr Kax Gga Xiu Nia

² Boxrlxlhexr kax gga Yirfarta hhexr,
 Yoxrdaxl mermi gga ni mel yelye a nga;

^t4:11 Xi'a leil bei naex gger lol nia, niul meixddur zze yar leil igax nia. Yilsi meldder yaa Yoxrdaxl su mel zuixl bei ggie igax meixr.

^u4:12 Yar yaa leil hher pex du lei lol a, loxlmoxr cirkuir-cirkuir mel ggieddei gga vei pex gger mel sael a nga. Ddar eil qir ddei yilsi mel dder Arbosobo yar leil dir su mel leil hher pex du lei lol a, yaa leil faxr nia.

nael ni dax halmaex ca ar ddei ddux lei a, ngo leil weix a,
Yirsaexllixl goxrjia leil guaxr nia.

Yar mel, halleix tortor dder zza dae;
yar mel, azo lei nr zza seir dder zza dae.

³ Yihexrhuaxr Yirsaexllixl su ca mel leil yaa leil dir su ca mel leil
jia gger a,
aniux xiu su ssormaer hal ddei ssor ddox leil xiu teixl lei zzezze
ci nia.

Halcar, yar ddei kebal arzzi-nimar mel, Yirsaexllixl su ca mel dax
jjixr lei nia.^v

⁴ Yar ngier du lei a, Yihexrhuaxr ddei wor mel leil nei
yar ddei Arbosobo Yihexrhuaxr ddei ddoddomo mi ddei leil
koxl dae a,
yar ddei acixl ya mel leil loxl nia.

Halcar, yar mel middurbbor cirmaex-hanga vaer zzir ddei bei
nia,
yel yaa zzasoso a nixixl goxr nia.

⁵ Yar^w yaa leil zzaso lol su ddei bei nia.

Yalsuxl su ca ddei niul mermi gga ddir lei a,
niul ddei zzirmar hher ggie xi ddei leil jjiux xiaxr gger car,
niul dder yaloxlmo sirler tiur teixl lei,
vaervaerpor heixller tiur teixl lei a,
Yalsuxl su ca ddei leil ddaexr nia.

⁶ Yaa altor sser a, Yalsuxl mermi leil guaxr nia,
Nirlul ddei mermi gga ddir lei ggie guaxr nia.

Yalsuxl su ca ddei niul mermi gga ddir lei a,
niul mermi ddei leil jjiux xiaxr gger car,
yar^x niul leil jiuxl nia.

^v5:3 Yirsaexlyal Sul 11:12-13, Yilixlmir Sul 31:2-6 nei 31:15-20, Yirsijixr Sul 37,
halae Hexrxi'a Sul 1:11 nei 3:5 leil Yirsaexllixl su ca mel jjixr lei nia biar dae.

^w5:5 Yar Yar meldder Boxrlixlhexr kax gga xiu teil lei hal ddei nga a.

^x5:6 yar Yar meldder Boxrlixlhexr kax gga xiu teil lei hal ddei nga a.

⁷ Yargel hhexr zza dae seir ca mel,
 ca hormo cuxr dax hher ji dae nia;
 Yihexrhuaxr dax ddar zei lei zil mel sael a nga;
 yoxl silbbar leil lei deix dae almer mel sael a nga.
 Yaa ca mel leil nr koxl,
 cassor-worssor mel leil lei nr xia.

⁸ Yargel hhexr zza dae seir ca mel,
 goxrjia cirke gga hormo cuxr dax hher ji dae nia,
 sixzzei cili gga hher dae yirvu-nilhax mel gga hhemar sael a nga,
 yoxl hhemar yarleixl ddei ya cili gga hher dae sael a nga.
 Yar ssi gel car,
 jjiux xiaxr gger nia, si xiaxr gger nia,
 ca jiuxl su nr zza.

⁹ Ni^y ni leil dir su ca mel leil bei leixl gger nia,
 ni leil vuxryixr su ca maelmaerjgia leil bei zil gger nia.

Yihexrhuaxr Cassor-worssor Mel Leil Faxr

¹⁰ Yihexrhuaxr bbeix:

“Hal cir ni ci a,
 ngo nia dax halmaex gga mur mel leil bei zil gger nia,
 nia ddei zaxlddaexrddu marcae mel leil bei xiaxr gger nia.

¹¹ Ngo halae nia ddei goxrjia gga ddei zzi mel leil bei xiaxr gger
 nia;
 weixrqiaxr maelmaerjgia leil caexr pixl gger nia.

¹² Yoxl ni leixrga gga neir bei dae mel bei pixl gger nia;
 nia dax halmaex gga lei zeixleixr azo lerler arsae nga var suax
 su nr zza a.

¹³ Ngo nia dax bbex mel nei legelbbe sser a bei teixl lei sseigu mel
 leil
 bei pixl gger nia;
 nia lei nia leixrhher gga bei teixl lei mel leil
 zeixleixr oldde-nr-textl a.

^y5:9 Ni Ni meldder Boxrlixlhexr kax gga xiu teil lei hal ddei nga a.

¹⁴ Ngo nia dax Yaxlsaexlla bbex mel leil zix teixl lei nia;
yoxl nia ddei zzi mel leil bei xiaxr gger nia.

¹⁵ Ngo lei sirzzizzimo, seifu faexfaex mo,
no-nr-ni su cirgoxr-hanga leil bei koxl xixl nia,”

eine bbeix a.

Yihexrhuaxr Yirsaexllixl Su Ca Mel Leil Bota

6 ¹ Mirjia bbeix:
Yirsaexllixl su ca mel nia Yihexrhuaxr bbeix dae mel noni dae
nia.

Ha du la a, worga mel dax armael leil ddar bbeix gger a,
worgassor mel leil ni ddar bbeix dae mel leil noni lol.^z

² Yihexrhuaxr mel yar ddei cassor-worssor mel leil bota nia,
hherdder Yirsaexllixl su ca mel leil larhorhormo bota nia.

Yel worga mel, nia Yihexrhuaxr bota dae mel leil noni dae nia.

Velver a zza doxr dae middur yarzibbor mel lei noni dae nia.^a

³ Yihexrhuaxr bbeix:

“Ngo ddei cassor-worssor mel,
ngo nia dax azo bei a leir?

Ngo nia leil arsae bei le lol a leir?

Nia ngo leil ddarkoxl ddo.

⁴ Ngo halleix nia leil Aezixr goxrjia gga hier teixl lei;
nia zebol mu ggie nia leil vae xixl lei.

Ngo lei Moxrxi, Yalluixr nei Mirlixl'axl leil miardal a,
nia xilmeir hier dae lol.

⁵ Ngo ddei cassor-worssor mel,

nia Moxrya zzirmar Balexl nr seir bei niazzir dae mel leil holcir
dae nia;

^z6:1 Worga nei worgassor meldder mer worxrke cassor-worssor mel leil bbeix.
Nael Yirsaexllixl su ca mel leil bbeix nr dax dae.

^a6:2 Yihexrhuaxr mel merlo-milo hazza leil yar Yirsaexllixl su ca mel leil bota
ggie noni dae lol.

Bir'aer ddei ssor Balaxr yar leil ddarkoxl dae mel leil holcir dae nia;^b

halae Sixltixr lagiex cirdae a Zixrjiaxr mermi zzezze pex dae mel leil holcir dae nia.^c

Eine nga a, nia dder ngo^d bbaehhexhhexmo bei dae mel leil saexl a,"

eine bbeix a.

Arbosobo Azo Lizoxr

⁶ Ngo azo vei a, Yihexrhuaxr dax lei a, mu zzir ggie hher dae Arbosobo meixsaer qir leil cizixl gger dae a, yar leil zi nia neil?

Cir koxl loxr loxrbbex mel sser a, adoxl gga cu a zilabox bei a, yar leil zi nia a ngo?

⁷ Yabol hormo du nei sser a, Yihexrhuaxr leil zi a, yar lizoxr a ngo?

Bbeixsael lazzarmo sael a pe dae saercor ssuvi hormo meir zex yar leil zi a yar lizoxr a ngo?

Ngo Arbosobo leil dir dae zuixl mel leil weix a, ngo ddei ssor vaervaer ddei yar leil zi cexr a ngo?

Ngo nixmox zzar xiar ji dae zuixl mel leil weix a, ngo armael xiu teixl lei mel yar leil zi cexr a ngo?

⁸ Middurbbor ca mel, Yihexrhuaxr ni leil arddol mel seir bbeix gger ho a.

Yar ni dax li dae mel azo a neil?

Hherdder ni bbaehhexhhexmo bei, ca leil zoxlnixr ggese, nixmox zzar nr col a, ni ddei Arbosobo dax mae, eimel nga a.

^b6:5 Gurlir eil ddei Mixrsuxljil Sul 22-24 leil biar dae.

^c6:5 halae Sixltixr lagiex cirdae a Zixrjiaxr zzi zzezze pex dae mel leil holcir dae nia. Arbosobo ddoddomo bei a, Yuedaxl lazzarmo gga ajjix mel bbe kae lol a, Yirsaexllixl su ca mel hieltebbor ssi gel a.

^d6:5 ngo Xiboxrlaexr ddar bbeix: "Yihexrhuaxr".

Yihexrhuaxr Yirsaexllixl Su Ca Me Leil Faxr

⁹ Olnolddu su ca mel Yihexrhuaxr ddei mi ddei leil gexr.

Yihexrhuaxr Yiluxlsaler zzi gga ca mel leil ae dae a bbeix:

“Yoxrdaxl ddei cuxr, nia yar leil noni nia.

¹⁰ Holbbaexl ngo, nixmox neix su ca mel ake gga nr seir bei a li
wo zzaegu naxrcixlcixl mel leil hol-nr-cir var a ngo?

Ngo vuxryixrddo sede nr hoxr mel leil hol-nr-cir var a ngo?

¹¹ Cex nr hoxr sser su ca mel

nei ca leil fur a sserddu cexltoxrloxr sser su ca mel,

ngo arsaе yaa leil zuixl nr zza i mal gger cexr bbeixleir?

¹² Zzi gga be su ca mel waxl zzae waxlwoxr duxr zzae duxr;

zzi gga goxr dae ca mel lei ddar jiar te;

yaa meir gga lo ddei ca fur.

¹³ Nia zuixl eimel bei a, ngo nia leil deil no gger nia;

nia leil cirza lei nr zza lol nia.

¹⁴ Nia zzor nia, nael zzor bbox nr var;

xilbe ddei halae meixr.

Nia cirza-hanga se pex dae mel lei dol ssei nr ddo.

Nia dol ssei dae mel, ngo altor vei su mel^e leil jia gger nia.

¹⁵ Nia loxlmoxr xiu nia, nael nia se wo nr ddo.

Nia saercor ssuvi yaxr nia, nael ggecir leil saercor ssuvi mei
ddu nr zza.

Nia puxрто jjiux nia, nael puxрто zzibbaer dda ddu nr zza.

¹⁶ Nia Axllixl ddei lixfaxr mel dax bei mae dae;

Yalha hhexr bei dae hazza dax bei mae dae;

nia yaa nr seir xiar dae mel dax mae ssi.

Yel, ngo nia leil cirza lei nr zza lol nia;

ca mel leil nia leil vaessi lol nia;

cirgoxr-hanga ca mel nia leil bbeix vuxryixr lol nia,”

eine bbeix a.

^e6:14 altor vei su mel Altor vei su eimel mel, yaa leil vuxryixr su, yaa leil ddaexr leixl gger su mel nga a.

Yirsaexllixl Su Ca Mel Zuixl Yarzi Neixl

7¹ Ael aer!

Ngo gielco zi saer caex su sael a nga,
puxrto dae ggie nirzzei dae puxrto caex su sael a nga,
nael mi neixr zzir vuxrhuagol mel nei puxrto maelmaerjjia caex
jjia ho a.

² Arbosobo dax bei mae dae su ca ddei middurbbor si a;
ca mel gga botaddu nr zza ca cirddeir lei nr zza.

Cirddei-hanga lei ca leil seixl niazzir;
arseir lei armael mermi su ca mel leil ker xiagl.

³ Yaa leixrhher zze yarzi gexrddo bei a, yarzi bei sexr;
vaervaerpor mel nei ca leil ser su mel si yaa leil ho dae mel li;
quexrlixl vaer su ca ddei yar nixmox zzar li niazzir dae nr seir
mel bbeix teixl lei;
yaa cirgo a nr seir mel bei.

⁴ Yaa ca mel gga seir zzir ddei lei alcur sael a nga;
nixmox seir zzir ddei lei alcur cubial sael a nga.

Ni ddei mermi ddei leil su su mel bbeix zaxr goxr faxr nixixl ddei
mel ci a.

Yel eilcar yaa zzilzzil-zzerzzer mo cirdoxr lei zza-nr-so nga
var.

⁵⁻⁶ Ssor zzae arbbor leil i zeil,

ssormaer zzae ama leil dir,

cirmu zzae yoxrmo leil dir,

ca leil vuxryixr su mel hherdder armael ake ca hhexr nga a.

Yel ni dax goxr naer dae ca mel leil koxl nr ddo;

ni ddei gaxggor-carbeix mel leil ddarzzi nr ddo.

Ni meir qir leil guaxr gex ver nia;

ni nixmoxzo leil koxl gex dae maerssor ddei dax lei biar nr ddo.

⁷ Ngo nael,

Yihexrhuaxr leil i dae a, yar leil xia nia;
ngo leil jiuxl su Arbosobo ddei leil xia nia.

Ngo ddei Arbosobo ngo biar dae mel leil noni nia.

⁸ Ngo leil dir su ca mel, ngo leil vaessi nr ssa,
ngo de zeï bbeixarnar a,
nael ngo ha du lei a;

ngo neixmarmar ggïe cux dae bbeixarnar a,
nael Yihexrhuaxr mel ngo ddei bbelele bei.

⁹ Ngo zuixl bei a Yihexrhuaxr leil de dae a;
yel yar seifu faex a ngo leil faxr a lei,
ngo sser gex dae nia,

yar ngo leil weixr a ddar te,
hoxrhoxrmo ngo leil ser hane ci.

Hane ci a yar ngo leil bbelele ggïe hier dil ci nia,
ngo yar ddei bbaehhexhhex mel leil mia wo nia.

¹⁰ Halcar, ngo leil dir su ddei eilmel leil mia nia.
Yar yixrsixr nr zza nia.

Yar mel dder ngo leil

“Ni ddei Arbosobo Yihexrhuaxr arddolmaex hher dae bbe
leir?”

bbeix su ca ddei nga a.

Ngo yar leil bei koxl xixl ggïe malmal mia nia;
yar leil zzijiul gga ddei nilhar mel sael a jjiux dae nia.

¹¹ Nia weixrqiaxr ggu box nixixl ddei ci var;
hal cir ni ci a, nia ddei middei ddei miur dax nia.

¹² Hal cir ni ci a, ca mel Yalsuxl goxrjia cirdae a Aezixr goxrjia
zzezze;

Aezixr goxrjia cirdae a lazzarmo vaervaer zex^f dax zzezze;
neixvi eil bbe dax cirdae a neixvi hal bbe dax zzezze;

^f7:12 lazzarmo vaervaer zex Lazzarmo vaervaer eil zex mel dder Yofaladir lazzarmo zex nga a. Yofaladir lazzarmo zex mel Yalsuxl goxrjia agala gga malmal a.

worga cirke dax cirdae a worga hal ga⁹ leil nia dax lei nia.

¹³ Nael, middurbbor goxr dae ca mel zuixl bei a,
middur ddei cirza lei nr zza loxr nia.

Yihexrhuaxr Yirsaexllixl Su Ca Mel Leil Perniar Nor Nixixl Nr Zza

¹⁴ Yihexrhuaxr, ni leil qiuxr,
ni ddei zzargger caex sser a, yaloxlmo sael a, ni ddei
cassor-worssor mel leil guaxr dae.

Yaa mel dder ni li wo mibbe ya mel nga a.
(Eilleix) yaa sixzzei cili gga hher dae.

Ni leil qiuxr, halleix sael a,
yaa leil middei naxrcixlcixl mel gga goxr dae lol la,
yaa leil Basa mermi nei Zilixl mermi zzorddu zza lol la.

¹⁵ Yihexrhuaxr bbeix:

“Ngo halleix nia leil Aezixr goxrjia gga hier teixl lei mel sael a,
ca mel leil murgurgurmo mia lol nia.”

eine bbeix a.

¹⁶ Cirgoxr-hanga ca mel eilmel leil mia a dder,
armael ddei wor mel bbeix lei bbeix nr bbe a,
qiaxrmeix zzi nr zza nia;

yaa leixrhher ddei meir ddei leil bbe gex dae;
nolba ddei no-nr-ni.^h

¹⁷ Yaa sae sael a, nilhar laexr nia,
yoxl middur leil maex dae mel sael a nga nia.

Yaa gexrnei-zinei yaa hher ggje ddux nia.

Yaa gexrgexr-zizi ngua ddei Arbosobo Yihexrhuaxr dax lei nia,
halae yaa ni leil gexr nia.

^{97:12} worga hal ga Worga eil ga mel dder Yiluxlsaler ddei worga. Arbosobo ddei xi zzir zi deix dae hal ga nga a.

^{h7:16} Yaa eine bei a mel, Arbosobo einezeixl ddo yaa xiar lei xiar nr ci a nga arddeir a.

¹⁸ Arbosobo, ca mel zi dae mel arseir ni sael a,
 zuixl neixlneixl mel leil ssoxrsuxl bbeixleir?

Arseir ni sael a, ni ddei cassor-worssor zza dae seir mel
 ni leil dir dae zuixl ddei leil zeixleixr vuxr-nr-yixr bbeixleir?

Ni arddolcar ci a lei seifu faex doxr nr var.

Ni ca leil seirseir meixl gger a perniar ggese.

¹⁹ Ni zeixleixr ngua leil zoxlnixr nia,
 ngua ddei zuixl neixlneixl mel leil qihher woxrke jjiux ji dae nia,
 ngua ddei zuixl maelmaerjjia leil neixvi neixl zzir ggie piar ji
 gger nia.

²⁰ Ni halleix tortor dder ngua porpor mel dax bbeixharzaxr dae
 ddar mel dax zox dae a,

Yargel dax ddarzzi ddoddomo bei nia,

Yalboxrlahar leil perniar a seirseir meixl gger nia.